

## आकाशवाणी

खास-खास खबरां :-

- प्रधानमंत्री नरेन्द्र मोदी होर अज्ज छत्तीसगढ़ जाडन ते राज्य दी स्थापना दे 25 बरें पूरे होने दे मौके उप्पर आयोजित समारोह ते होरनें कार्यक्रमें च हिस्सा लैडन।
- रक्षा मंत्री राजनाथ सिंह अज्ज मलेशिया देकुआलालपुर च आसियान मुल्खें दे रक्षा मंत्रिणं दी 12मीं बैठक - ए.डी.एम.एम प्लस च हिस्सा लै'रदे ना।
- बदेश मंत्री डाक्टर एस. जयशंकर होरें आखेआ ऐजे भारत ते ब्रिटेन दे सरबन्ध इक जटिल ऐतिहासिक सैहयोग थमां अगगे बधियै इक गतिशील ते दूरदर्शी सांझ-भ्याली दे रूपै च विकसित होए ना।
- विशिष्ट पन्छान सरबन्धी भारती प्राधिकरण-यू.आई.डी.ए.आई ने भविक्ख च सुरक्षित डिजिटल पन्छान गी मजबूत करने लेई आधार दृष्टिकोण-2032 दी रूपरेखा जारी कीती।
- भारत ने स्वस्थ नारी, सशक्त परिवार अभियान दे तैहत 3 गिनीज़ वर्ल्ड रिकार्ड स्थापत कीते ना।
- जर्मनी दे सारब्रुकेन च हाइलो ओपन सुपर-500 बैडमिंटन टूर्नामेंट च भारत दी उन्नति हुड्डा महिला सिंगल्स दे सेमीफाइनल च पुज्जीगेइयां ना।

<><><><><><>

## PM Chattisgarh

प्रधानमंत्री नरेन्द्र मोदी अज्ज छत्तीसगढ़ जाडन ते राज्य दी स्थापना दे 25 बरें पूरे होने दे मौके उप्पर आयोजित समारोह ते होरनें कार्यक्रमें च हिस्सा लैडन। श्री मोदी सिडक, उद्योग, सेहत सेवाएं ते उर्जा दे खेत्तरें दिएं 14 ज्हार 260 करोड़ रुपें शा मते दिएं केई विकास परियोजनाएं दा शुभारंभ बी करडन। प्रधानमंत्री 'दिल की बात' पैहलकदमी दे तैहत नवा रायपुर अटल नगर च स्थित श्री सत्य साईं संजीवनीअस्पताल च 'जीवन का उपहार' कार्यक्रम च दिलै सरबन्धी जन्मांदरू बमारिणं दा कामयाबी कन्नै इलाजकराई चुके दे तकरीबन ढाई ज्हार बच्चें कन्नै गल्लबात करडन। एह्दे प्रधानमंत्री परैन्त श्री मोदी ब्रह्माकुमारी दे "शांति शिखर" दा उद्घाटन करडन, जेह्दा आध्यात्मिक शिक्षा, शांति ते ध्यान दा इक आधुनिक केंद्र ऐ। श्री मोदी नवा रायपुर अटल नगर च स्थित छत्तीसगढ़ विधानसभा दे नमें भवन च साबका प्रधानमंत्री भारत रत्न अटल बिहारी वाजपेयी हुं'दी प्रतिमा परा पर्दा बी गोहाडडन। प्रधानमंत्री होर नमें विधानसभा भवनदा उद्घाटन बी करडन ते इस मौके उप्पर जनसमूह गी संबोधित करडन। प्रधानमंत्री होर दपैहरी'लै, शहीद वीर नारायण सिंह स्मारक ते जनजातीय स्वतंत्रता सेनानी संग्रहालय दा उद्घाटन करडन। ओहू संग्रहालय पोर्टल ते ई-बुक 'आदि शौर्य' दा बी विमोचनकरडन ते घोडे पर सोआर शहीद वीर नारायण सिंह हुं'दी प्रतिमा परा पर्दागोहाडडन। ग्रामीण आजीविका मजबूत करने दे मकसद कन्नै प्रधानमंत्री होर 9 जिलें च 12नमें स्टार्ट-अप ग्राम उद्यमिता कार्यक्रम ब्लॉकें दा उद्घाटन करडन। ओहू नमें-बनाए गेदे 3 लक्ख 51 ज्हार घरें दे गृह प्रवेश च बी हिस्सा लैडन ते प्रधानमंत्री आवास योजना-ग्रामीण दे तैहत 3 लक्ख लाभार्थियें गी किश्तें दे रूप च इक ज्हार 200 करोड़ रुपे जारी करडन। श्री मोदी होर पत्थलगांव-कुनकुरी थमां छत्तीसगढ़-झारखंड सीमा तगर चार लेन आह्ले ग्रीनफील्ड हाईवे दा नीहू पत्थर बी रक्खडन जिसी भारतमाला परियोजना दे तैहत 3 ज्हार 150 करोड़

रपें दी लागत कन्नै विकसित कीता जाह्ग। प्रधानमंत्री मोदी होर जांजगीर-चांपाते राजनांदगांव च द'उं स्मार्ट औद्योगिक खेत्तरें दे कन्नो-कन्नो नवा रायपुर दे सेक्टर 22 च इक फार्मास्युटिकल पार्क दा नींह पत्थर बी रक्खडन। ओहू राज्य च 5 नमें सरकारी मेडिकल कॉलेज ते बिलासपुर च इक सरकारी आयुर्वेद कॉलेज ते अस्पताल दा बी नींह पत्थर रक्खडन।



### **Def. ADMM-Plus**

रक्षामंत्री राजनाथ सिंह होर मलेशिया दे कुआलालपुर च अज्ज आसियान रक्षा-मंत्रियों दी बैठक ADMM-Plus च हिस्सा लै रदे न। इस दौरान रक्षामंत्री होर 15 बरे दे चिंतन ते भविक्ख दे कार्यक्रम विशे पर फोरम गी सम्बोधित करंगन। ADMM दक्खण पूर्व एशियाई राष्ट्र संघ-आसियान दे अंदर सर्वोच्च रक्षा सलाहकार ते सहयोगी निकाय दे तौर पर कम्म करदा ऐ। रक्षामंत्री होरें कल दुई आसियान-भारत रक्षा-मंत्रियों दी अनौपचारिक बैठक च हिस्सा लैता। इस मौके पर बोलदे होई रक्षामंत्री होरें आखेया जे अज्ज दी दुनिया च जित्थे केई परानी मान्यता ते आस-तांगां बदला रदियां न। उत्थै गै आसियान-भारत सरबंध स्थिरता दा इक मजबूत थम्म बने दे न।



### **EAM-India –UK**

विदेशमंत्री डाक्टर एस. जयशंकर होरें आखेया ऐ जे भारत ते बरतानिया दे सरबंध इक जटिल ऐतिहासिक सहयोग थवां बदिऐ इक गतिशील ते दूरदर्शी सांझेदारी च विकसित होए न। कल नमीं दिल्ली च ब्रिटेन दे राष्ट्रीय दिवस समारोह गी सम्बोधित करदे होई डाक्टर जयशंकर होरें आखेया जे दौनें मुल्ले च नां छडा प्रौद्योगिकी सुरक्षा पैहल तैहत सहयोग दा विस्तार कीता ऐ, सगुआं सम्पर्क-राबता, ए.आई ते महत्वपूर्ण खनिजें दे सरबंधे च इस्सी होर बी मजबूत कीता ऐ। उनें इस गल्ला पर जोर दिता जे 9 प्रमुख ब्रिटिश विश्वविद्यालयें गी भारत च अपने परिसर कायम करने दी मंजूरी थहोई गेई ऐ।



### **Bihar Campaigning**

बिहार विधानसभा दे पैहले गैड दे चुनाएं दी तरीक जियां-जियां कोल आवा'रदी ऐ- चुनां प्रचार होर बी तेज होई गया ऐ। पैहले गैड च राज्य दे 18 जिलें च विधानसभा दी 21 सीटें आस्तै 6 नवम्बर गी वोट पाए जागंन। एन.डी.ए, महागठबंधन ते होर दुए दलें दे वरिष्ठ नेता अज्ज केई रैलियां करंगन। हालांकि राज्य दे केई हिस्सें च होआ'रदी बरखा करी चुनां प्रचार प्रचार च किश रुकावट आई ऐ। खराब मौसम करी कल केई सारे स्टार प्रचारकें ते वरिष्ठ नेताएं दियां रैलियां रद्द करनियां पेइयां।



### **UIDAI Frame Work**

भारती विशिष्ट पन्धान प्राधिकरण-यू.आई.डी.ए.आई ने.आई. ब्लॉकचेन, क्वांटम कंप्यूटिंग ते एडवांस एन्क्रिप्शन दे माध्यम कन्नै भविक्ख च सुरक्षित डिजिटल पन्धान गी मजबूत करने लेई आधार दृष्टिकोण-2032 दी रूपरेखा जारी कीती। इलेक्ट्रॉनिक्स ते सूचना प्रौद्योगिकी मंत्रालय ने आखेआ ऐ जे एह रूपरेखा भारतदी डिजिटल पन्धान ईको-सिस्टम गी परतियै परिभाशत करने ते अगले दहाके लेई अगलीपीढी दे डिजिटल शासन गी रफ्तार देने गितै इक व्यापक कार्ययोजना प्रदान करग। आधार गी डिजिटल व्यक्तिगत डेटा संरक्षण अधिनियम ते वैश्विक साइबर सुरक्षा मानकें मूजब बनाने लेई प्रौद्योगिकी खेत्तर दे माहिरें दी इक उच्च-स्तरीय समिति ने इस रूपरेखागी तैयार कीता ऐ। मंत्रालय ने आखेआ ऐ जे एह कार्य-योजना तकनीकी म्हारथ बनाई रक्खनेते सुरक्षित, समावेशी ते जन-केंद्रित डिजिटल पन्धान दे रूप च आधार गी बेहतरबनाने दे बारै च ऐ।



## Three Guinness World Record

भारत नै “स्वस्थ नारी, सशक्त परिवार” अभियान दे तैहत त्रै गिनीज वलर्ड रिकार्ड कायम कीते न। इस पैहल नै केंई सारे रिकार्ड बी बनाए न- जिंदे च इक गै महीने च सब्भनें थवां मते 3 करोड 21 लोकें दा पंजीकरण शामिल ऐ। इक हफ्ते च ऑनलाईन स्तन कैंसर दी जांच आस्तै सब्भनें थवां मते लोकें दा पंजीकरण बी कीता गया ऐ। इसदे इलावा राज्य स्तह पर इक हफ्ते च ऑनलाईन महत्वपूर्ण लक्षणें दी जांच आस्तै रिकार्ड सवा लक्ख लोकें पंजीकरण करोआया ऐ।



## Badminton

जर्मनी दे सारब्रुकेन च हाइलो ओपन सुपर-500 बैडमिंटन प्रतियोगिता च भारत दी उन्नति हुड्डा महिला एकल दे सैमीफाईनल च पुज्जी गई ऐ। उन्नति नै क्वार्टर फाइनल च चौथी वरीयता हासिल चीनी ताइपे दी लिन सियांग टी गी 22-20, 21-13 कन्नै हराया। सैमीफाईनल च उन्दा मुकाबला शीर्ष वरीयता हासिल इंडोनेशिया दी पुत्री कुसुमा वर्दानी कन्नै होगा। इस प्रतियोगिता च उन्नति खीरी 4 च पुज्जने आहली इक मात्र भारतीय खडारी ऐ। मर्दे दे सिंगल्स च भारत दी चुनौती कल लक्ष्य सेन- आयुष शेटी ते किरण जॉर्ज दे अपने-अपने क्वार्टर फाईनल मैच हारने कन्नै गै मुक्की गई।



## IMD Weather

मौसम विभाग नै अंडमान निकोबार द्वीप समूह, अरुणाचल प्रदेश, असम, मेघालय ते बिहार च अज्ज तेज बरखा दा अनुमान जाहिर कीता ऐ। गुजरात, उप-हिमालयी पच्छिम बंगाल, सिक्किम ते पच्छिम मध्य-प्रदेश च बी तेज बरखा दी संभावना ऐ। पच्छिम बंगाल दे गांगेय क्षेत्र ते ओडिशा च गरज बूदाबांदी ते तेज हवाएं करी बिजली चमकने दा बी अनुमान ऐ। उत्तरी कोंकण दे कंडे, पूर्वी मध्य दे किश हिस्सें, उत्तर पूर्वी अरब सागर ते अंडमान सागर च अज्ज तेज हवा चली सकदी ऐ। राष्ट्रीय राजधानी दिल्ली च अज्ज धुंध यां फही हलका कोहरा छाए रौहने दी संभावना ऐ। केन्द्रीय प्रदूषण नियंत्रण बोर्ड मूजब दिल्ली –NCR च हवा दी गुणवत्ता खराब बनी दी ऐ। बड्डलै 7 बजे हवा दी गुणवत्ता 233 दर्ज कीती गई।



## Navy-Trishul

त्रौनें सेनाएं दा महा-अभ्यास “त्रिशूल” पाकिस्तान कन्नै लग्गदी पच्छमी सीमा पर जारी ऐ। नौसेना ऑपरेशन महा-निदेशक वाइस एडमिरल ए.एन. प्रमोद होरें कल नमीं दिल्ली च मीडिया आहलें गी दस्सेया जे एह अभ्यास 13 तरीक तगर चलौगा। उनें आखेया जे भारतीय सेना दा दक्खनी कमान, नौ-सेना दा पच्छमी कमान, वायु सेना दा दक्खनी-पच्छमी कमान ते तट रक्षक- सीमा सुरक्षा बल ते होर दुई केन्द्रीय एजेंसियां इसदे च हिस्सा लै रदियां न। नौसेना इस अभ्यास च 20 थवां 25 युद्ध पोत ते वायु सेना 40 लडाकू जहाजें कन्नै हिस्सा लै रदी ऐ। वाइस एडमिरल प्रमोद होरें आखेया जे इसदा मकसद समुन्द्री बलें ते होर दुए रक्षाबलें बश्कार तालमेल बदाना ऐ।



## Darbar Move

जम्मू-कश्मीर 4 बरे दे वक्फे मगरा दरबार मूव आहली रिवायत इक बारी परतियै शुरु होई गई ऐ। श्रीनगर च 5 दिन कम्म करने आहले दफ्तर कल बंद होई गे हे ते 6 दिन कम्म करने आहले दफ्तर अज्ज बंद होगंन। सारे दफ्तर जम्मू च सोमवार खुल्ली जागंन। जम्मू-कश्मीर, सिडक यातायात सरबंधी कारपोरेशन नै कर्मचारियें दी आवाजाई लेई लोडचदे इंतजाम कीते दे न। दरबार मूव तैहत 39 दफ्तर जेदे च मुख्मंत्रि हुंदा सचिवालय ते होर दुए महत्वै आहले मैहकमें शामिल न- ओह पूरी चाली जम्मू थमां कम्म करगंन। 147 बरे पैहले डोगरा महाराजा आसेया रणनीतिक ते मौसमी हालात दे मद्देनजर दरबार मूव आहली रिवायत गी शुरु कीता गया हा। इसी 2021 च बंद करी दिता गया हा।

